

## GAYA PENTAFSIRAN JAMAL AL-DIN AL-QASIMI DALAM TAFSIR MAHASIN AL-TA'WIL

NIK MOHD ZAIM AB RAHIM

Akademi Tamadun Islam, Fakulti Sains Sosial dan Kemanusiaan, Universiti Teknologi  
Malaysia, Kuala Lumpur  
Email: [nmzaim.kl@utm.my](mailto:nmzaim.kl@utm.my)

MONIKA @ MUNIRAH ABD RAZZAK

Jabatan al-Quran dan al-Hadith, Akademi Pengajian Islam, Universiti Malaya, Kuala Lumpur  
[munirahar@um.edu.my](mailto:munirahar@um.edu.my)

HAMIZAH RUSLAN

Jabatan al-Quran dan al-Hadith, Akademi Pengajian Islam, Universiti Malaya, Kuala Lumpur

### ABSTRAK

*Jamal al-Din al-Qasimi (1866-1914) antara nama yang cukup dikenali dalam kalangan pendokong gerakan Islam era moden. Dalam dunia penulisan, beliau banyak menghasilkan karya dalam pelbagai bidang seperti bidang tauhid, tafsir, hadis, fikah, sejarah dan falsafah. Antara karya dalam bidang tafsir ialah kitab *Mahasin al-Ta'wil*. Artikel ini bertujuan membincangkan pemikiran tafsir beliau dengan mengetengahkan cara dan gaya pentafsiran yang dikemukakan ketika mentafsirkan ayat-ayat al-Quran. Justeru, kajian ini berbentuk kajian kepustakaan dengan menjadikan metode analisis kandungan sebagai metode pengumpulan data, manakala metode induktif, deduktif dan komparatif sebagai metode analisis data. Jelasnya, hasil analisis terdapat gaya pentafsiran ayat-ayat kawniyyah oleh al-Qasimi mendapati beliau mempunyai cara dan gaya persembahan yang tersendiri dalam mentafsirkan ayat-ayat al-Quran yang dapat diringkaskan kepada empat gaya iaitu mengemukakan ayat al-Quran lain yang berkaitan ayat yang sedang ditafsirkan, menyebut kata-kata ahli perubatan apabila menyentuh mengenai ayat perubatan, menyebut pendapat ahli falak ketika mentafsirkan ayat berkaitan astronomi, dan menghaskan bahagian tanbihat selepas menjelaskan secara tahlili bagi setiap ayat yang ditafsirkan.*

**Kata kunci:** gaya pentafsiran, tafsir ‘ilmī, ayat al-Quran, pandangan pakar bidang

### Pengenalan

Jamal al-Din al-Qasimi merupakan antara tokoh pentafsir al-Quran al-Karim era moden. Tafsir beliau, *Mahasin al-Ta'wil* antara salah satu corak tafsir yang muncul dan berkembang melalui metode tafsir ijmalī. Kitab tafsir ini juga dinilai sebagai antara karya tafsir yang memadukan antara aliran *tafsir bi al-ma'thur* dengan *tafsir bi al-ra'y*. Untuk itu, artikel ini bertujuan memaparkan sebahagian daripada gaya dan corak pentafsiran beliau dalam menjelaskan ayat-ayat *kawniyyah* dalam al-Quran al-Karim.

### Metodologi Kajian

Kajian ini menggunakan metode analisis kandungan dengan menjadikan ayat-ayat al-Quran yang berbentuk *kawniyyah* dalam kitab tafsir *Mahasin al-Ta'wil* sebagai objek kajian. Manakala metode induktif, metode deduktif dan metode komparatif pula digunakan untuk menganalisis data iaitu ayat-ayat al-Quran yang berbentuk *kawniyyah* yang terpilih.

### Biroografi Ringkas Jamal al-Din al-Qasimi

Jamāl al-Dīn al-Qāsimī atau Muḥammad Jamāl al-Dīn al-Qāsimī bin Muḥammad Sa‘īd bin Qāsim berketurunan daripada keturunan al-Ḥasan bin Alī, cucu Rasulullah SAW melalui ‘Abd al-Qādir al-Jaylānī al-Baghdādī (al-‘Azmi, 1999). Nama panjang beliau disebut dalam *Qāmūs al-Šinā’at al-Shāmiyah* sebagai Muḥammad Jamāl al-Dīn Abu al-Farj bin Muḥammad Sa‘īd bin Qāsim ibn Ṣāliḥ bin Ismā’īl bin Abi Bakr. Gelaran al-Qāsimī dinasabkan kepada datuknya, Qāsim ibn Ṣāliḥ (al-‘Azmi, 1988). Datuk beliau, Qāsim ibn Ṣāliḥ turut digelar sebagai al-Ḥallāq. Beliau merupakan seorang imam di bumi Syam pada zamannya dan merupakan seorang yang mempunyai ilmu mendalam tentang agama serta menguasai seni bahasa. Jamāl al-Dīn al-Qāsimī dilahirkan pada hari Isnin 8 Jamādil Awwal 1283H bersamaan 17 September 1866M di Damsyik, Syria dan wafat pada petang Sabtu 23 Jamādil Awwal 1332H bersamaan 1914M, juga di Damsyik, Syria (al-Zirikli, 2002).

Al-Qāsimī mendapat pendidikan awal di kampung dan bandar sekitar bumi kelahirannya, Syria. Beliau juga merantau ke luar negara seperti Mesir dan Madinah untuk menimba ilmu pengetahuan (al-Zirikli, 2002). Peristiwa yang tidak diduga berlaku ke atas al-Qāsimī apabila beliau dituduh mengadakan mazhab sendiri yang dikenali sebagai *al-Madhhab al-Jamālī* disebabkan pengaruhnya yang luar biasa dalam kalangan masyarakat pada ketika itu (Nuwayhid, 1988). Beliau ditangkap oleh kerajaan Syria pada tahun 1313H /1895M atas tuduhan menyertai kegiatan bersama dengan beberapa ulama lain seperti ‘Abd al-Razzāq al-Baytār, Aḥmad al-Husnī al-Jazā’īrī, Salīm Samārah, Taufiq al-Ayyūbī, Sa‘īd al-Farrā, Muṣṭafā al-Ḥallāq dan lain-lain. Kumpulan ulama ini merupakan golongan yang bersungguh-sungguh menggalakkan para ilmuwan untuk berijtihad dan tidak semata-mata bertaqlid. Mereka bersama-sama mewujudkan kumpulan pengajian kitab-kitab agama. Kumpulan ini dikenali sebagai *Jam‘iyah al-Mujtahidīn*. Atas dasar itulah, al-Qāsimī digelar sebagai *Hādithah al-Mujtahidīn*, yang bermaksud pembaharu dalam kalangan mujtahid (<http://majles.alukah.net/t30300/>, 2009). Beliau kemudiannya dibebaskan setelah terbukti tidak bersalah.

Selepas insiden penahanan tersebut, beliau semakin dikenali ramai. Beliau mula menceburi bidang penulisan dan penyebaran ilmu dalam bidang tafsir, syariah dan sastera. Penulisan al-Qāsimī telah tersebar melalui pelbagai majalah dan akhbar di Syria. Hasil karya al-Qāsimī terdiri daripada lebih 72 buah (dikatakan lebih 100 buah karya) dengan latar belakang ilmu yang pelbagai seperti tafsir, tauhid, hadith, akhlak, sejarah dan sastera (Nuwayhid, 1988). Beliau dikatakan mula menulis pada usia 16 tahun.

Al-Qāsimī melawat bumi Mesir pada tahun 1903M. Pada ketika itu, beliau mula mengenali ulama Mesir yang mempunyai kepakaran dalam pelbagai bidang ilmu termasuk bidang tafsir iaitu Muḥammad Abduh dan Muḥammad Rashīd Riḍā. Mereka juga dikenali sebagai reformis yang terlibat dalam gerakan Islah di Mesir. Pada tahun 1908M, Rashīd Riḍā melakukan kunjungan balas kepada al-Qāsimī ke Damsyik, Syria. Rashīd Riḍā menyampaikan pengajiannya di *al-Jāmi’ al-Umawī*, Damsyik. Dalam penulisan, al-Qāsimī banyak menggunakan uslub sastera. Beliau terpengaruh dengan gaya penulisan gurunya, Muḥammad Abduh yang terkenal dengan gaya penulisan prosa (*al-tarassul*) (al-‘Azmi, 1988).

### Penulisan Tafsir *Mahasin al-Ta’wil*

Al-Qāsimī mula menulis tafsir *Mahasin al-Ta’wil* pada tahun 1317H sehingga penghujung usianya. Beliau membahagikan tulisan beliau kepada 12 jilid yang besar. Namun, untuk tujuan penerbitan, ia dibahagikan kepada 17 jilid oleh anaknya, Zāfir al-Qāsimī. Beliau berusaha untuk menerbitkan kitab tafsir ini agar dapat dikekalkan manfaatnya kepada orang ramai. Beliau mengambil masa setahun bagi mencetak satu jilid kitab. Beliau mendapat ransangan untuk menerbitkan kitab tafsir ini lantaran suatu hari beliau menerima sepuak

surat daripada seorang alim dari Indonesia selepas 42 tahun kewafatan bapanya yang menanyakan perihal kitab *Maw'iżah al-Mu'minīn* (al-'Ajmi, 1999).

Al-Qāsimī menulis ayat al-Quran dengan menggunakan dakwat merah, manakala syarah tafsirnya ditulis dengan menggunakan dakwat hitam. Seluruh tulisan dalam kitab ini merupakan hasil tulisan tangan Jamāl al-Dīn al-Qāsimī. Hal ini menunjukkan kemungkinan besar bahawa tidak terdapat salinan lain selain daripada tulisan asal al-Qāsimī yang diwarisi oleh anak-anaknya (al-Qasimi, 1965). Kitab tafsir ini mempunyai gaya persembahan yang tersendiri. Pengkaji menilai penulisan kitab ini berdasarkan cetakan pertama terbitan *Dār Ihyā' al-Kutub al-'Arabiyyah* pada tahun 1957M, ditahqiq oleh Muhammad Fu'ād 'Abd al-Bāqī.

### Kaedah Pentafsiran

Al-Qāsimī mentafsirkan al-Quran berdasarkan sumber yang berautoriti. Beliau mengemukakan hujah dan bukti yang kukuh berdasarkan nas al-Quran, hadith, pendapat ulama terdahulu dan kitab-kitab yang menjadi rujukan al-Qāsimī sepanjang pentafsiran.

Kaedah pentafsiran dapat dikategorikan kepada dua kaedah utama iaitu *ma'thūr* dan *ra'yī*. Kaedah *tafsīr al-ma'thūr* ialah kaedah apabila suatu pentafsiran dibuat bersandarkan kepada ayat al-Quran, hadith Nabi SAW dan juga pandangan sahabat (Mahmud, 2000) Sesetengah ulama memasukkan pendapat golongan tabiin juga daripada pentafsiran *al-ma'thūr*. (al-Dhahabi, 2005) Manakala kaedah pentafsiran *al-Ra'yī* adalah dengan memerhati dan memahami ayat al-Quran dengan bantuan pengetahuan dalam bidang-bidang yang lain sebagai contoh ilmu bahasa, ilmu sains dan lain-lain (Mahmud, 2000). *Al-tafsīr al-ra'yī* juga dikenali sebagai *al-tafsīr al-'aqlī*. Pentafsiran sahih yang selamat daripada unsur penyelewengan mesti melalui metode berikut (Al Ja'far, 1980):

- i. Mentafsirkan ayat al-Quran dengan hadith Nabi SAW.
- ii. Menyandarkan pentafsiran kepada kata-kata sahabat.
- iii. Menyandarkan pentafsiran kepada perbahasan bahasa Arab yang tepat.
- iv. Mentafsirkan ayat al-Quran berdasarkan makna kalimah al-Quran dan tidak keluar daripada lindungan syarak.

Berdasarkan garis panduan di atas, sebelum pentafsiran secara *al-tafsīr al-'aqlī* dilakukan, seseorang pentafsir mesti memastikan kewujudan hadith Nabi SAW atau kata-kata sahabat berkaitan perkara yang ditafsirkan. Sekiranya tiada periyawatan, maka ijтиhad daripada mufassir diperlukan dalam menyempurnakan pentafsiran ayat al-Quran bagi tujuan pencapaian maksud suatu ayat atau topik di dalam al-Quran.

### Gaya Persembahan al-Qāsimī Dalam *Tafsīr Ilmī*

Setelah dilakukan penelitian terhadap kitab *Maḥāsin al-Ta'wīl*, didapati al-Qāsimī telah menggunakan gaya persembahan yang tersendiri dalam penulisan *tafsīr ilmī* dan ia dapat diringkaskan kepada empat gaya.

#### i. Mempersembahkan ayat al-Quran lain yang berkaitan

Sebelum al-Qāsimī membahaskan ayat dengan lebih lanjut, beliau akan menyatakan beberapa ayat al-Quran yang mempunyai tema yang sama dengan ayat yang ditafsirkan. Sebagai contoh apabila al-Qāsimī membahaskan surah al-Hāqqah ayat 17.

وَالْمَلَكُ عَلَى أَرْجَائِهَا وَيَحْمِلُ عَرْشَ رَبِّكَ فَوْقَهُمْ يَوْمَئِذٍ تَمَاهِيَةٌ

Surah al-Hāqqah, 69: 17

Terjemahan: Sedang malaikat-malaikat (ditempatkan) mengawal segala penjurunya, dan arasy Tuhanmu pada saat itu dipikul oleh lapan malaikat di atas malaikat-malaikat yang mengawal itu.

Al-Qāsimī kemudiannya membawakan surah al-A'rāf ayat 54 ... yang bermaksud "...lalu Dia (Allah) bersemayam di atas arasy...". Selepas didatangkan ayat yang kedua ini, al-Qāsimī memasukkan perbincangan berkenaan ayat. Beliau mengemukakan pandangan ahli falak bahawa bumi mempunyai tujuh lapisan langit dan apabila ditambah dengan bumi maka ia menjadikan jumlah lapan seperti dalam ayat surah al-Hāqqah (١٧). Langit dan bumi ini dihubungkan oleh tarikan graviti masing-masing (al-Qasimi, 1957).

## ii. Menyebut kata-kata ahli perubatan berkaitan ayat perubatan

Al-Qāsimī menukilkan pendapat ahli perubatan (الأطباء) dalam melakukan pentafsiran berkenaan ayat-ayat sains berkenaan kesihatan. Sebagai contoh, pentafsiran al-Qāsimī berkenaan surah al-Baqarah ayat 219.

يَسْأَلُونَكُمْ عَنِ الْحُمْرِ وَالْمَيْسِرِ قُلْ فِيهِمَا إِثْمٌ كَبِيرٌ وَمَنَافِعٌ لِلنَّاسِ وَإِثْمُهُمَا أَكْبَرُ مِنْ نَفْعِهِمَا وَيَسْأَلُونَكُمْ مَاذَا يُفِيقُونَ قُلْ الْعَفْوُ كَذَلِكَ يُبَيِّنُ اللَّهُ لَكُمُ الْآيَاتِ لَعَلَّكُمْ تَتَفَكَّرُونَ

Surah al-Baqarah 2: 219

Terjemahan: Mereka bertanya kepadamu (wahai Muhammad) mengenai arak dan judi. Katakanlah: "Pada kedua-duanya ada dosa besar dan ada pula beberapa manfaat bagi manusia tetapi dosa kedua-duanya lebih besar daripada manfaatnya dan mereka bertanya pula kepadamu: Apakah yang mereka akan belanjakan (dermakan)? Katakanlah: "Dermakanlah apa-apa yang berlebihan daripada keperluan (kamu). Demikianlah Allah menerangkan kepadamu ayat-ayat-Nya (keterangan hukum-Nya) supaya kamu berfikir."

Ayat ini membincangkan tentang keburukan arak dan judi yang lebih banyak mudarat berbanding manfaat yang diperoleh manusia daripada kedua-duanya. Dalam mentafsirkan ayat ini, al-Qāsimī menulis 16 keburukan arak yang meliputi keburukan dari segi kesihatan akal, jiwa dan juga merupakan satu kerugian harta. Antara yang dinyatakannya ialah (al-Qasimi, 1957):

- i. Arak tidak menghilangkan dahaga, bahkan ia semakin menghauskan peminumnya.
- ii. Arak tidak merangsang perkembangan akal dan jasmani.
- iii. Arak menyebabkan pelbagai penyakit berkaitan perut (sistem penghadaman).
- iv. Arak memudaraskan paru-paru dan boleh mengakibatkan *Typhoid fever* (demam yang disebabkan oleh jangkitan bakteria *Salmonella serotypes*) (Santos, 2001).
- v. Arak menjadi sebab kesengsaraan hidup, kemiskinan dan penyakit kepada peminum tegarnya.

Al-Qāsimī turut menyebut bahawa menjauhkan diri daripada arak boleh membawa kepada kesihatan dan kebahagiaan seseorang. Perkara ini ditekankan oleh beliau bahawa arak memberikan lebih banyak mudarat berbanding manfaat yang bersifat sementara dan palsu.

### iii. Menyebut kata-kata ulama falak pada pentafsiran berkaitan ayat astronomi

Al-Qāsimī menyebut sebanyak 16 kali frasa “*berkata sebahagian ulama falak*” (قال بعض علماء ) (الفلك) dan frasa “*berkata ahli falak*” (قال علم فلكي) dalam pentafsirannya. Penggunaan kalimah (بعض) di dalam frasa menunjukkan al-Qāsimī merujuk lebih daripada seorang ahli falak dalam kajian mengenai astronomi. Antara ahli falak yang dirujuk oleh al-Qasimi ialah Sheikh ‘Abd al-Qādir al-Tantawī. Walau bagaimanapun, tidak semua ayat astronomi ditafsirkan dengan mengemukakan pandangan ulama falak. Hal ini menunjukkan bahawa al-Qāsimī turut mempunyai pengetahuan dan ijтиhad tersendiri dalam bidang astronomi.

Sebagai contoh, pentafsiran surah al-Şāffāt ayat 10.

إِلَّا مَنْ خَطِفَ الْحُكْمَةَ فَأَتَبْعَثُ شَهَابَ ثَاقِبًا  
Surah al-Şāffāt 37:10

Terjemahan: Kecuali sesiapa di antara syaitan itu yang curi mendengar mana-mana percakapan (malaikat), maka ia diburu dan diikuti (dengan rejaman) api yang menjulang lagi menembusi.

Ayat ini membicarakan tentang larangan mendengar perbualan langit terhadap syaitan. Walaupun ia merupakan perbahasan suatu yang bersifat *ghaybiyyah*, namun al-Qāsimī (1957) mengambil pandangan ahli falak berkenaan dua perkara yang utama iaitu:

- i. Hal ini menunjukkan wujudnya makhluk Allah yang soleh dan toleh di luar bumi. Tidak bermakna perkara yang tidak sampai kepada pengetahuan manusia adalah tidak wujud, seperti manusia kewujudan mikrobat dan elektrik yang tidak kelihatan, tetapi sebenarnya ada.
- ii. Rejaman terhadap syaitan adalah daripada api, yang mana planet-planet atau objek-objek samawi dicipta daripada unsur yang sama iaitu unsur api daripada matahari.

Dalam melakukan pentafsiran ayat astronomi, al-Qāsimī bijak dalam menggunakan maklumat saintifik berkenaan falak dan mengaitkannya dengan pentafsiran ayat-ayat *al-kawniyyah*. Beliau juga banyak membandingkan penemuan saintis silam yang menyalahi fakta semasa, kemudian dibawakan hujah yang berkaitan bagi mengukuhkan pentafsiran.

### iv. Mengkhaskan bahagian *tanbīhāt* (تبیهات)

Satu gaya persembahan yang memudahkan pembaca dalam memahami ayat al-Quran melalui pentafsiran beliau ialah bahagian *tanbīhāt* (تبیهات) yang dikelaskan oleh al-Qāsimī selepas melakukan pentafsiran secara *al-taḥlīlī* bagi setiap ayat. Sebagai contoh pentafsiran bagi surah al-‘Alaq ayat 6 hingga 8.

كَلَّا إِنَّ الْإِنْسَانَ لَيَطْغَى . إِنْ رَآهُ اسْتَغْنَى . إِنْ إِلَيْ رَبِّكَ الرُّجُوعُ  
Surah al-‘Alaq 96: 6-8

Terjemahan: Ingatlah! Sesungguhnya jenis manusia tetap melampaui batas (yang sepatutnya atau yang sewajibnya). Dengan sebab ia melihat dirinya sudah cukup apa yang dihajatinya. (Ingatlah) sesungguhnya kepada Tuhanmu tempat kembali (untuk menerima balasan).

Selepas mendatangkan ketiga-tiga ayat, al-Qāsimī menjelaskan makna ayat bahawa sifat manusia itu melampaui batas dan mendustakan nikmat yang diberikan oleh Allah dengan melakukan kekufuran dan maksiat. Beliau turut menghuraikan hikmah penggunaan kalimah

كَلَّا di dalam ayat yang menunjukkan kesungguhan Allah SWT menarik perhatian manusia tentang perkara yang akan disampaikan.

Setelah itu, al-Qāsimī (1957) menulis bahagian *tanbīh* bagi menerangkan maksud ayat dengan lebih jelas. Beliau mengaitkan ayat ini dengan kaedah menjana kewangan yang terpuji. Kaedah menjana kewangan dengan baik terdiri daripada tiga syarat yang utama iaitu:

- i. Mendapat harta dengan cara yang halal, seperti mengusahakan sumber alam, pampasan atau mengambil upah.
- ii. Pelaburan kewangan yang dibuat tidak menyempitkan kehidupan orang lain seperti sistem monopoli.
- iii. Tidak mengambil wang (keuntungan) melebihi kadar yang sepatutnya. Sekiranya hal ini tidak dipatuhi, maka ia akan merosakkan akhlak dan peribadi seseorang. Oleh sebab itu, hikmah pengharaman riba meliputi aspek politik, akhlak dan sosial manusia.

Maklumat penting ini diambil oleh al-Qāsimī melalui penulisan ‘Abd al-Rahmān al-Kawākibī di dalam kitabnya, *Tabā’i’ al-Istibdād wa Maṣāri’ al-‘Isti’bād*.

Tegasnya, gaya penulisan *tafsīr ‘ilmī* oleh al-Qāsimī mudah difahami dan dirujuk oleh pembaca dalam kalangan ahli akademik mahupun orang awam yang mempunyai penguasaan bahasa Arab yang baik. Beliau menghuraikan kehendak ayat secara ringkas dan padat bagi membolehkan pembaca memahaminya dengan baik. Huraian panjang yang dilakukan oleh al-Qāsimī kebiasaannya bersifat spiritual yang membawa pembaca kembali kepada hakikat kebijaksanaan dan sifat ketuhanan Allah SWT.

### Contoh *Tafsīr ‘ilmī* Menurut Al-Qāsimī

Al-Qāsimī mempunyai ilmu yang meluas dalam pelbagai bidang. Beliau mengaitkan ayat al-Quran dengan fenomena alam. Walaupun al-Qāsimī tidak menyatakan secara langsung kategori ilmu yang dibincangkan, berdasarkan huraian beliau menunjukkan fakta yang selari dengan penemuan saintifik oleh saintis. Oleh sebab itu, pengkaji mengambil inisiatif bagi mengelaskan huraian pentafsiran al-Qāsimī mengikut bidang yang bersesuaian dengannya.

#### i. Fizik

Perkataan fizik berasal daripada bahasa Yunani, *physis* yang bererti tabii, alam atau *nature*. Falsafah sains fizik dalam al-Quran ialah satu bidang ilmu sains natural yang akan membincangkan setiap kejadian yang wujud secara fizikal di alam semesta ini hasil ciptaan Allah SWT mengikut *sunnatullah* (hukum Allah SWT). Bidang ini menjelaskan fenomena tabii yang berkaitan dengan alam fizikal termasuk sains hayat, sains bumi, sains optik dan sains alam yang disebutkan dalam al-Quran (Yahaya, 2014). Sebagai contoh pentafsiran ayat 35 surah al-Nūr,

اللَّهُ نُورُ السَّمَاوَاتِ وَالْأَرْضِ مَثَلُ نُورِهِ كَمِشْكَاهٍ فِيهَا مِصْبَاحٌ الْمِصْبَاحُ فِي رُجَاحَةِ الرُّجَاحَةِ  
كَانَهَا كَوْكَبٌ دُرْرِيٌّ يُوقَدُ مِنْ شَحْرَةٍ مُبَارَكَةٍ رَّيْسُونَةٍ لَا شَرْقَةٌ وَلَا غَرْبَةٌ يَكَادُ رَيْسُهَا يُضِيِّعُ وَلَوْ  
لَمْ تَمْسَسْهُ نَارٌ نُورٌ عَلَى نُورٍ يَهْدِي اللَّهُ نُورُهُ مَنْ يَشَاءُ وَيَضْرِبُ اللَّهُ الْأَمْثَالَ لِلنَّاسِ وَاللَّهُ بِكُلِّ  
شَيْءٍ عَلِيمٌ

### Surah al-Nūr 24:35

Terjemahan: Allah (pemberi) cahaya kepada langit dan bumi. Perumpamaan cahaya-Nya seperti sebuah lubang yang tidak tembus yang di dalamnya ada pelita besar. Pelita itu di dalam tabung kaca, (dan) tabung kaca itu bagaikan bintang yang berkilauan, yang dinyalakan dengan minyak dari pohon yang diberkati, (iaitu) pohon zaitun yang tumbuh tidak di timur dan tidak pula di barat, yang minyaknya (sahaja) hampir menerangi, walaupun tidak disentuh api. Cahaya di atas cahaya (berlapis-lapis), Allah memberi petunjuk kepada cahaya-Nya bagi orang yang dikehendaki, dan Allah membuat perumpamaan-perumpamaan bagi manusia. Dan Allah Maha Mengetahui segala sesuatu.

Fokus perbincangan berdasarkan ayat ini ialah teori penciptaan lampu. *Fīhā misbāḥ* di dalam ayat bermaksud lampu yang memancarkan cahaya yang terang. Ia berasal daripada tengah-tengah balang (*al-mishkāh*) yang diperbuat daripada kaca. *Al-Zujāj* dalam ayat bermakna kaca. Balang kaca yang berhasil daripadanya cahaya itu seakan-akan cahaya itu tidak dibantu oleh sumber yang lain, padahal ia berasal daripada sumbu api di dalam *al-mishkāh*. Semakin sempit ruang, maka semakin terang kekuatan cahaya daripada balang kaca. Berbeza dengan satu ruang yang luas, cahaya semakin malap dan berselerak. Sumbu api (*al-qindīl*) dan minyak ialah perkara asas yang membantu kekuatan cahaya. Pada zaman moden kini, *al-mishkāh* dikenali sebagai kaca mentol dan *al-qindīl* dikenali sebagai filamen. Kejernihan dan keaslian minyak yang menjadi bahan api untuk membakar sumbu itu menentukan kekuatan cahaya yang dihasilkan.

Dalam menerangkan hikmah ayat ini, al-Qāsimī (1957) memasukkan nilai-nilai moral sebagai hamba kepada Tuhan. Cahaya daripada dasar yang dimaksudkan ialah kekuatan dan keluhuran hati seseorang yang disinggahi cahaya Allah. Pemberi cahaya ialah Allah, penerima ialah hamba, tempat cahaya ialah hati, pembawa cahaya ialah keazaman dan kemahuan manakala hasil pancaran cahaya ialah amalan dan perkataannya. Manakala analogi lain ialah *al-mishkāh* itu ibarat dada manusia, dan *al-zujājah* itu ibarat hati manusia. Jika terhalang kaca oleh sebab debu dan kotoran, maka mustahil cahaya dapat menembusi hati dan memancarkan keluar cahaya daripada dalam. Begitu dalam makna yang dipetik oleh al-Qāsimī daripada ayat berkenaan cahaya Tuhan. Beliau mengaitkan maklumat daripada ayat dengan bidang saintifik, seterusnya mengambil pengajaran sebagai tazkiyah diri selaku hamba Tuhan.

Contoh kedua ialah pentafsiran ayat 164 surah al-Baqarah,

إِنَّ فِي خَلْقِ السَّمَاوَاتِ وَالْأَرْضِ وَالْخِلَافِ اللَّيلُ وَالنَّهَارُ وَالْفُلْكُ الَّتِي تَجْرِي فِي الْبَحْرِ إِمَّا  
يَنْفَعُ النَّاسَ

Terjemahan: Sesungguhnya pada penciptaan langit dan bumi, pergantian malam dan siang, kapal yang berlayar di laut dengan (muatan) yang bermanfaat bagi manusia...

### Surah al-Baqarah 2:164

Ayat mengenai pelayaran kapal berat di lautan menjadi bukti kewujudan Allah SWT. Al-Qāsimī (1957) menyebut secara ringkas bahawa kemampuan kapal (kapal kontena yang membawa barang yang berat) terapung di atas air adalah kerana keberadaan gas pada kapal. Dalam ilmu sains, perkara yang menyebabkan suatu objek terapung di atas air adalah kerana

densiti (berat objek dibahagikan dengan isipadu objek) lebih rendah berbanding densiti air. Dalam perihal penciptaan kapal, walaupun ia diciptakan daripada besi yang berdensiti tinggi, namun udara yang terperangkap di dalam kapal mengurangkan densiti kapal. Ia juga berkait rapat dengan bentuk kapal yang membolehkannya memerangkap lebih banyak udara untuk menampung muatan yang lebih berat, tetapi masih terapung di atas lautan (Barras, 2004). Perkara ini perlu dibahaskan dengan lebih lanjut mengikut formula fizik yang tepat bagi menambahkan pemahaman di dalam bidang ini. Gaya pentafsiran al-Qāsimī bersifat ringkas dan hanya menimbulkan permulaan buah fikiran yang sesuai dengan beberapa teori fizik yang berkaitan.

Al-Qāsimī (1957) menyebut bahawa hukum alam yang melibatkan berat jisim antara satu sama lain ini menunjukkan kekuasaan Allah SWT. Sekiranya tuhan kepada air, dan tuhan kepada angin bukan tuhan yang sama, sudah tentu hukum alam ini tidak dapat diaplikasi dengan baik. Manusia mencipta teori-teori tertentu berdasarkan kajian melalui kebiasaan fenomena yang berlaku. Ciri-ciri kapal menentukan kemampuan kapal untuk menanggung kapasiti muatan sama ada muatan barang ataupun muatan manusia di atasnya bagi menyeimbangkannya dengan densiti air di laut.

### Biologi

Biologi ialah ilmu sains yang membincangkan tentang hidupan dan interaksinya dengan hidupan yang lain serta keadaan sekeliling. Perkataan biologi berasal daripada dua perkataan Greek iaitu *bio*, yang bermaksud hidup dan *logos*, yang bermaksud pengetahuan. Hidupan terbahagi kepada dua iaitu haiwan dan tumbuhan. Oleh sebab itu, biologi tidak terkeluar daripada perbincangan tentang dua bidang utama iaitu botani (tumbuhan) dan zoologi (haiwan) (Muttaqui, 2009).

Sains biologi ialah sains hayat (kehidupan). Perkataan *bio* yang bererti hidup diulang sebanyak 216 kali dalam pelbagai surah al-Quran yang menerangkan benda-benda hidup seperti manusia, haiwan dan tumbuhan. Bidang ini mengkaji tentang fenomena benda hidup dan mekanismenya yang membolehkan sistem kehidupan daripada peringkat sel hingga kepada biofera (alam kehidupan) yang secara dasarnya merangkumi 15 bahagian; anatomi, biokimia, biobumi, biomatematik, biofizik, ekologi, etologi, patologi, fisiologi, taksonomi, sitologi, genetik, bioteknologi, pertumbuhan dan perkembangan, serta evolusi (Yahaya, 2014). Perkara yang akan disentuh dalam kajian ini hanya skop perbahasan mengenai manusia, haiwan dan tumbuhan sahaja. Sebagai contoh dalam ayat 99 surah al-An‘ām,

...وَجَنَّاتٍ مِّنْ أَعْنَابٍ وَالزَّيْتُونَ وَالرُّمَّانَ مُسْتَبِّهًا وَغَيْرَ مُتَشَابِهٌ

Surah al-An‘ām 6: 99

Terjemahan: ...Dan kebun-kebun anggur, dan (Kami keluarkan pula) zaitun dan delima yang serupa dan yang tidak serupa.

Ayat ini menyebut perihal keunikan buah-buahan yang bermacam-macam jenis di dunia ini. Ayat ini menunjukkan kepada manusia tentang empat jenis buah terbaik dari segi zat pemakanannya iaitu kurma, anggur, zaitun dan delima (*pomegranate*). Al-Qāsimī mengetengahkan keajaiban buah delima dari segi bentuk dan nutrisinya. Buah delima terdiri daripada empat elemen yang utama iaitu; *qashr* (قشر), *syaḥm* (شحم), *‘ajam* (عجم) dan *mā’* (ماء). Tiga elemen yang utama sifatnya menyejukkan, iaitu *qasyr* (bahagian lapisan kulit luar yang keras, *syaḥm* (lapisan di antara buah dan kulit dan seterusnya *‘ajam* (isi bersama bijinya yang merupakan elemen terpenting dalam buah). Elemen yang keempat ialah air. Buah delima mempunyai kandungan air yang sangat sedikit dan air ini merupakan bahagian

yang sangat lazat dan bermanfaat. Ia mempunyai khasiat untuk menguatkan mental (minda) manusia. Ia merupakan makanan bergizi pada satu sudut dan mampu mengubati penyakit pada sudut yang lain (al-Qasimi, 1957).

Contoh kedua ialah pentafsiran ayat 69 surah al-Nahl,

بِمِكْلِي مِنْ كُلِّ الشَّمَرَاتِ فَاسْلُكِي سُبْلَ رَبِّكَ دُلْلًا يَخْرُجُ مِنْ بُطُونِهَا شَرَابٌ مُخْتَلِفٌ أَلْوَانُهُ فِيهِ  
شِفَاءٌ لِلنَّاسِ إِنَّ فِي ذَلِكَ لَآيَةً لِقَوْمٍ يَتَفَكَّرُونَ

Surah al-Nahl 16: 69

Terjemahan: Kemudian makanlah daripada segala jenis buah-buahan lalu tempuhlah jalan Tuhanmu yang telah dimudahkan (bagimu)." Daripada perut lebah itu keluar minuman (madu) yang bermacam-macam warnanya, di dalamnya terdapat ubat yang menyembuhkan bagi manusia. Sungguh, pada yang demikian itu benar-benar terdapat (tanda) kebesaran Allah bagi yang benar-benar berfikir.

Ayat ini menunjukkan bahawa madu boleh menjadi penawar kepada manusia daripada suatu penyakit. Bersandarkan keyakinan ini, al-Qāsimī (1957) mendatangkan hadith daripada Abu Sa‘īd al-Khudrī r.a bahawa seorang lelaki datang bertemu dengan Rasulullah SAW dan mengadu tentang kesakitan di dalam perut yang dialami oleh saudara lelakinya. Maka baginda menasihati beliau untuk meminum madu sehingga beberapa kali lelaki tersebut mengadu masih sakit, baginda SAW tetap menyuruhnya meminum madu sebagai penawar. Akhirnya, saudara lelakinya sembuh daripada penyakit itu.

Kemudian, al-Qāsimī (1957) meneruskan lagi penjelasannya dengan menaqalkan pandangan ahli perubatan yang ditulis oleh Ibn Kathīr dalam kitabnya bahawa pesakit tersebut mempunyai masalah *al-fadālat* (seperti penyakit cirit birit atau keracunan makanan). Apabila beliau meminum madu, maka ia bertindak menolak perkara-perkara yang bermasalah di dalam usus, oleh sebab itu perut menjadi semakin sakit sebelum sembuh.

### Sains Sosial

Sains sosial ialah bidang yang membincangkan tentang seseorang atau sekumpulan manusia dengan meneliti tabiat seseorang atau tabiat masing-masing di dalam satu komuniti secara kolektif. Sains sosial terdiri daripada pelbagai cabang seperti psikologi, sosiologi dan ekonomi. Sains sosial berbeza dengan sains tulen seperti fizik dan biologi yang mempunyai ukuran dan fakta yang tepat tentang suatu perkara. Sains sosial bersandarkan kepada kajian yang sentiasa berubah-ubah dan kurang tepat. Ia bergantung kepada telahan dan anggapan berdasarkan sesuatu yang sering berlaku (Bhattacherjee, 2012). Falsafah sains sosial dalam al-Quran terdiri daripada beberapa perkara iaitu falsafah pendidikan iqra', sejarah tamadun Islam, sosiologi, antropologi, falsafah sosiologi, psikologi, politik, ekonomi, undang-undang dan akhlak (Yahaya, 2014).

Antara contoh yang menunjukkan perbahasan mengenai ilmu politik di dalam al-Quran adalah berdasarkan surah Yūsuf. Perihal ini dijelaskan oleh al-Qāsimī dalam bahagian kesimpulan intipati surah Yūsuf selepas selesai pentafsiran setiap ayat di dalam surah tersebut. Al-Qāsimī menulis bahawa terdapat tiga tahap dalam politik iaitu pengurusan diri, rumah (keluarga) dan juga bandar (masyarakat). Pendidikan yang diutamakan dalam pengurusan ketiga-tiga tahap ini ialah pendidikan akhlak yang baik. Nabi Yūsuf AS mempraktikkan penguasaan ketiga-tiga tahap ini dengan baik, dan hal ini diceritakan di dalam surah Yūsuf.

Sejak kecil, Nabi Yūsuf AS melalui proses pembinaan diri setelah berjauhan dengan keluarga kerana di‘buang’ oleh saudara lelakinya di dalam perigi. Setelah itu, baginda tinggal bersama keluarga raja di istana sebagai hamba. Dari situ, berlaku beberapa peristiwa sehingga baginda dimasukkan ke dalam penjara. Di penjara, Nabi Yūsuf mendidik rakan-rakan sepenjaranya berkenaan ajaran Tuhan. Baginda menyebarkan ajaran agama walau ke mana baginda dicampakkan dengan ilmu dan akhlak yang ada pada baginda. Dengan ilmu, baginda dikeluarkan daripada penjara dan berpeluang menjadi orang kanan raja Mesir bagi memberikan nasihat kepada raja berkenaan pentadbiran, pengurusan kewangan, pengurusan sumber makanan dan sebagainya. Baginda diangkat menjadi bendahara (menteri kewangan) di dalam kerajaan Mesir. Nabi Yūsuf AS melalui kisah yang panjang di negara Mesir daripada perhambaan kepada penguasaan.

Al-Qāsimī (1957) menukilkan pandangan al-Fārābī bahawa terdapat 12 sebab yang boleh membentuk sesebuah masyarakat. Antaranya adalah melalui bahasa, negara, agama, akhlak, kaum dan kepimpinan. Faktor-faktor ini menjadi titik perbezaan antara suatu masyarakat dengan masyarakat yang lain. Terdapat 12 ciri-ciri kepimpinan yang baik bagi memastikan kesejahteraan suatu masyarakat berdasarkan surah Yūsuf, iaitu:

1. Suci daripada nafsu syahwat dan mempunyai kekuatan dalaman yang teguh.

كَذِلِكَ لِنَصْرِفَ عَنْهُ السُّوءَ وَالْفَحْشَاءَ، إِنَّهُ مِنْ عِبَادِنَا الْمُحْلَصِينَ  
Surah Yūsuf 12:24

Terjemahan: Demikianlah (takdir Kami) untuk menjauhkan daripada Yusuf perkara-perkara yang keji dan mungkar kerana sesungguhnya beliau daripada hamba-hamba Kami yang dibersihkan daripada segala dosa.

2. Kelembutan semasa marah bagi mengawal dirinya.

قَالُوا إِنْ يَسْرِقُ فَقَدْ سَرَقَ أَخْ لَهُ مِنْ قَبْلٍ، فَأَسْرَرَهَا يُوسُفُ فِي نَعْسِهِ وَمَمْبُدِهَا لَهُ  
Surah Yūsuf 12:77

Terjemahan: Mereka berkata: “Kalau dia mencuri, maka (tidaklah pelik), kerana sesungguhnya saudara kandungnya pernah juga mencuri dahulu. (Mendengar kata-kata yang menyinggung itu) maka Yusuf pun menyembunyikan perasaannya dan tidak menyatakan kepada mereka.

3. Meletakkan kelembutan dan kekerasan pada tempatnya.

وَلَمَّا جَهَزَهُمْ بِجَهَازِهِمْ قَالَ أَتُؤْنِي بِأَخَ لَكُمْ مِنْ أَيْكُمْ، أَلَا تَرَوْنَ أَنِّي أُوْفِي الْكَيْلَ وَأَنَا خَيْرٌ  
الْمُنْزَلِينَ، فَإِنْ لَمْ تَأْتُونِي بِهِ فَلَا كَيْلٌ لَكُمْ عِنْدِي وَلَا تَفْرِيُونَ  
Surah Yūsuf 12:59-60

Terjemahan: Dan ketika Yusuf menyediakan untuk mereka bekalan mereka, berkatalah beliau: “(Pada kali yang lain) bawalah kepadaku saudara kamu yang sebapa. Tidakkah kamu melihat bahawa aku menyempurnakan bekalan makananmu dan aku sebaik-baik penerima tetamu? Oleh itu, kalau kamu tidak membawanya kepadaku, maka tidak ada hak bagi kamu mendapat bekalan makanan di sisiku dan janganlah kamu menghampiriku lagi.

4. Mempunyai sifat kepercayaan dan keyakinan diri yang tinggi, serta amanah.

اجْعَلْنِي عَلَى خَزَائِنِ الْأَرْضِ إِنِّي حَفِظُ عَلَيْمٌ

Surah Yūsuf 12:55

Terjemahan: Yusuf berkata: “Jadikanlah aku pengurus perbendaharaan hasil bumi (Mesir), sesungguhnya aku sedia menjaganya dengan sebaik-baiknya dan mengetahui cara-cara mentadbirnya.”

5. Daya ingatan yang kuat.

وَجَاءَ إِخْوَةُ يُوسُفَ فَدَخَلُوا عَلَيْهِ فَعَرَفُوهُمْ وَهُمْ لَهُ مُنْكِرُونَ

Surah Yūsuf 12:58

Terjemahan: Dan (setelah tiba musim kemarau) datanglah saudara-saudara Yūsuf (ke Mesir) lalu masuklah mereka mendapatkannya; Yusuf serta merta mengenali mereka, sedang mereka tidak mengenalinya.

6. Kemampuan firasat.

إِنِّي رَأَيْتُ أَحَدَ عَشَرَ كَوَافِرًا وَالشَّمْسَ وَالْقَمَرَ رَأَيْتُهُمْ لِي سَاِجِدِينَ

Surah Yūsuf 12:4

Terjemahan: (Ingatlah peristiwa) ketika Nabi Yusuf berkata kepada bapanya: “Wahai ayahku! Sesungguhnya aku bermimpi melihat sebelas bintang dan matahari serta bulan; aku melihat mereka tunduk memberi hormat kepadaku.”

7. Persediaan ilmu yang mantap.

وَاتَّبَعْتُ مِلَّةَ آبَائِي إِبْرَاهِيمَ وَإِسْحَاقَ وَيَعْقُوبَ، مَا كَانَ لَنَا أَنْ نُشْرِكَ بِاللَّهِ مِنْ شَيْءٍ، ذَلِكَ

مِنْ فَضْلِ اللَّهِ عَلَيْنَا وَعَلَى النَّاسِ وَلَكِنَّ أَكْثَرَ النَّاسِ لَا يَشْكُرُونَ

Surah Yūsuf 12:38

Terjemahan: Dan aku menurut agama bapa dan datuk nenekku; Ibrāhīm dan Ishāq serta Ya'qūb. Tidak sepatutnya kita mempersekuatkan sesuatu pun dengan Allah. Hal tersebut (mentauhidkan Allah) ialah kurniaan Allah kepada kita dan umat manusia namun kebanyakan manusia tidak bersyukur.

Sifat ini turut disebut dalam surah Yūsuf ayat 22 dan 101.

8. Belas kasihan terhadap golongan yang lemah dan tawaduk dengan ketinggian kedudukannya.

Nabi Yūsuf AS memanggil sahabat sepenjaranya dengan gelaran yang mulia iaitu يا صاحِي السُّجْنِ yang bermaksud: “Wahai sahabatku berdua yang sepenjara...”.

9. Sifat pemaaf.

قَالَ لَا تَشِّبِّهُ عَيْنِكُمُ الْيَوْمَ، يَغْفِرُ اللَّهُ لَكُمْ، وَهُوَ أَرْحَمُ الرَّاحِمِينَ

Surah Yūsuf 12:92

Terjemahan: Yūsuf berkata: “Kamu pada hari ini tidak akan ditempelak atau disalahkan (tentang perbuatan kamu yang telah terlanjur itu), semoga Allah mengampunkan dosa kamu, dan Dia jua Yang Maha Mengasihani daripada segala yang lain mengasihani.

10. Memuliakan ahli keluarga.

وَأَنُونِي بِأَهْلِكُمْ أَجْعَيْنَ

Surah Yūsuf 12:93

Terjemahan: ... Dan bawalah kepadaku keluarga kamu semuanya.

11. Kemahiran bertutur secara ilmiah dan hikmah.

فَلَمَّا كَلَمَهُ قَالَ إِنَّكَ الْيَوْمَ لَدَيْنَا مَكِينٌ أَمِينٌ

Surah Yūsuf 12:54

Terjemahan: Setelah Yūsuf berkata-kata dengannya (raja), raja berkata: “Sesungguhnya engkau pada hari ini (wahai Yūsuf) seorang yang berpangkat tinggi, lagi dipercayai dalam kalangan kami”.

12. Kemahiran pengurusan.

قَالَ تَزَرَّعُونَ سَبْعَ سِنِينَ دَأْبًا فَمَا حَصَدْتُمْ فَدَرُوهُ فِي سُبْلِهِ إِلَّا قَلِيلًا مِمَّا تَأْكُلُونَ

Surah Yūsuf 12:47

Terjemahan: Yūsuf menjawab: “Hendaklah kamu menanam bersungguh-sungguh tujuh tahun berturut-turut, kemudian apa yang kamu tuai biarkanlah pada tangkai-tangkainya, kecuali sedikit daripada bahagian yang kamujadikan untuk makan.

Berdasarkan surah Yūsuf, al-Qāsimī (1957) telah mengeluarkan beberapa kisah yang terdapat di dalamnya sebagai pengajaran kepada manusia tentang pengurusan sosial manusia agar dapat mencapai kesejahteraan sejagat baik dari segi keamanan, keagamaan, ekonomi dan pentadbiran. Hal ini selari dengan perjuangan al-Qāsimī sendiri yang melibatkan diri secara langsung di dalam perjuangan membawa masyarakat kepada jalan agama yang benar melalui gerakan Islah yang digerakkan bersama barisan para ulama yang lain.

### Geologi dan Geografi

Geologi ialah bidang yang mengkaji tentang penciptaan bumi dan perkembangannya, hidupan purba di bumi, kajian tentang logam, arang dan juga minyak yang terdapat jauh ke dalam perut bumi. Di bawah bidang geologi, terdapat *geophysics*, *petrogeologist* dan *geographer*. Saintis bidang biologi juga tidak terlepas daripada mengkaji ilmu geologi (Alvia, 2005). Geologi membincangkan asal usul kejadian bumi, bahan-bahan di dalam perut bumi, aliran air di atas muka bumi, kejadian gunung berapi dan lain-lain (Chapman, 1995).

Sains geologi ialah sains tabii yang pada asalnya membincangkan tentang kesuburan bumi, kemudian ilmu ini diperluas kepada beberapa penghususan termasuk mineralogi, petrologi, geologi struktur, geokimia, geologi ekonomi, geomorfologi, hidrogeologi, geologi

sejarah, geokronologi, geologi kejuruteraan, geologi petroleum, geologi persekitaran, astrogeologi, geologi isotop dan mikropaleontologi. Ia turut dipanggil imu bumi (Yahaya, 2014). Fungsi gunung juga termasuk dalam ilmu geologi yang mempunyai perkaitan secara langsung dan tidak langsung dengan ilmu geografi (Kamarul Azmi, 2013).

Sebagai contoh ialah Surah al-Naba' ayat 7,

وَأَجْنِدَالْ أَوْتَادًا

Surah al-Naba' 78:7

Terjemahan: Dan gunung-ganang sebagai pasak.

Al-Qāsimī (1957) menerangkan fungsi gunung sebagai pasak bumi. Gunung menjadi pasak kepada bumi bagi mengelakkan ketidakstabilan bumi, sekaligus mengelakkan berlaku gegaran kepada bumi. Beliau mendatangkan contoh pasak yang dipasang pada penjuru khemah. Paku yang digunakan adalah untuk mengelakkan khemah daripada bergerak daripada tempat asal. Ayat ini mempunyai kaitan dengan teori pergerakan gunung yang disebut dalam firman Allah SWT dalam surah al-Naml ayat 88. Pengkaji meletakkan perbahasan mengenai perkara ini di dalam bab keempat bagi menganalisis pentafsiran al-Qāsimī dalam bidang astronomi.

Ilmu geografi pula ialah ilmu yang membincangkan tentang keadaan kehidupan manusia berdasarkan politik, ekonomi, budaya dan suasana suatu negara atau daerah-daerah di sesebuah negara (Bradshaw, 2000). Dalam kajian ilmu geografi, al-Qāsimī merujuk buku *Geography* karya Ptolemy, seorang saintis berbangsa Rom pada zaman awal Masihi dan juga karya Aristotle seperti kitab *al-Hayawān*. Berbicara mengenai ilmu ini, al-Qāsimī mentafsirkan surah al-Kahfi ayat 98 secara panjang lebar.

قَالَ هَذَا رَحْمَةٌ مِّنْ رَبِّي فَإِذَا جَاءَ وَعْدُ رَبِّي حَعَلَهُ دَكَّاءٌ وَكَانَ وَعْدُ رَبِّي حَقًّا

Surah al-Kahfi 18:98

Terjemahan: (Setelah itu) berkata Zulkarnain: "Ini ialah suatu rahmat dari Tuhan; dalam pada itu apabila sampai janji Tuhan, Dia akan menjadikan tembok itu hancur lebur dan janji Tuhan itu adalah benar.

Al-Qāsimī (1957) menggariskan sembilan *tanbihāt* daripada ayat ini. Antaranya ialah perbahasan mengenai sosok Zulkarnain itu sendiri; nama sebenar, asal usul, mengapa ia digelar sebagai Zulkarnain (*Dhū al-Qarnayn*) dan lain-lain. Fokus pengkaji berkenaan ayat ini adalah berkenaan kedudukan tembok yang dibina oleh Zulkarnain pada suatu ketika dahulu. Al-Qāsimī mendatangkan pandangan ulama silam berkenaan kedudukan tembok yang dibina antara dua gunung bagi mengepung suatu kaum yang dipanggil sebagai Ya'jūj dan Ma'jūj atau istilah di dalam bahasa Inggerisnya ialah *Gog and Magog*. Antara pandangan yang diambil oleh beliau adalah daripada al-Rāzī yang mengatakan bahawa tembok itu berada di negara timur; iaitu di antara dua gunung yang terletak di Armenia dan Azerbaijan. Disebut bahawa kawasan ini merupakan sebahagian daripada tanah negara Turki.

Selain itu, al-Qāsimī juga menukilkan pandangan Ibn Hazm, Ahmad bin al-Tayyib al-Sarakhsī dan lain-lain. Kemudian, beliau menulis kenyataan yang dirasakan paling tepat bahawa tembok tersebut berada di kawasan Dagestan, suatu daerah di Rusia. Ia terletak di

antara dua bandar; bandar Derbend dan Khūzār (خوزار). Terdapat satu tempat yang terkenal sebagai Bāb al-Hadīd yang merupakan kawasan tinggalan tembok besi lama antara dua gunung yang dikenali sebagai Caucasus, masyarakat Arab menyebutnya sebagai Jabal Qāf. Sejarah mencatatkan bahawa Jabal Qāf ini menyimpan sejarah yang besar bagi penduduknya, iaitu tembok ini berperanan sebagai benteng daripada serangan musuh yang dikenali sebagai *al-Mutabarbarīn*. Ya'jūj dan Ma'jūj mempunyai sifat menyerupai *al-Mutabarbarīn* ini dan dipercayai merupakan bangsa keturunan Asia dan Rusia (al-Qasimi, 1957). Berdasarkan huraian al-Qāsimī dalam membincangkan kedudukan geografi suatu tempat, ia menunjukkan bahawa beliau tidak memandang remeh isu negara-negara sekitarnya terutamanya yang mempunyai kaitan dengan sejarah dan falsafah agama.

### Astronomi

Astronomi ialah cabang sains yang membincangkan tentang objek-objek di angkasa lepas. Ia membincangkan mengenai saiz, komposisi, kedudukan, asal usul dan pergerakannya (Angelo, 2002). Ilmu astronomi turut dikenali sebagai ilmu falak dalam bahasa Arab. Asas dalam ilmu falak ialah persoalan takwim, arah kiblat, waktu solat dan perspektif rukyah dan hisab (Baharuddin, 2004).

Ilmu falak ialah salah satu ilmu sains tabii yang mengkaji perjalanan badan-badan cakerawala seperti bumi, bulan, matahari dan bintang-bintang (Baharuddin, 2004). Falsafah sains astronomi menurut al-Quran ialah bidang sains tabii yang membicarakan tentang semua objek di alam semesta, di luar bumi dan dalam atmosfera termasuk segala galaksi, bintang, bulan dan planet yang dapat memberi manfaat kepada manusia (Yahaya, 2014). Sebagai contoh di dalam Surah al-Ra'd ayat 3,

وَهُوَ الَّذِي مَدَ الْأَرْضَ وَجَعَلَ فِيهَا رَوَاسِيَ وَأَنْهَارًا وَمِنْ كُلِّ النَّمَرَاتِ حَعَلَ فِيهَا رَوْجِينٌ اثْنَيْنِ  
يُعْشِي اللَّيْلَ النَّهَارَ إِنَّ فِي ذَلِكَ لَا يَاتِ لِقَوْمٍ يَتَفَكَّرُونَ

Surah al-Ra'd 13:3

Terjemahan: Dan Dia yang menghamparkan bumi dan menjadikan gunung-gunned serta sungai-sungai di atasnya. Dan padanya Dia menjadikan semua buah-buahan berpasang-pasangan, Dia menutupkan malam kepada siang. Sesungguhnya pada yang demikian itu terdapat tanda-tanda (kebesaran Allah) bagi mereka yang berfikir.

Melalui ayat ini, al-Qāsimī menerangkan kebarangkalian siang lebih panjang daripada malam dan sebaliknya. Apabila waktu malam lebih panjang daripada waktu siang maka terjadilah musim *al-shitā'* (musim sejuk), manakala apabila waktu siang lebih panjang daripada waktu malam maka terjadilah musim *al-ṣaif* (musim panas). Dan di antara dua musim tersebut terdapat dua musim lain sebagai perantaraan antara kedua-duanya iaitu musim *al-kharīf* (musim luruh) dan musim *al-rabi'* (musim bunga).

Al-Qāsimī (1957) turut menyatakan gunung menjadi sebab terjadinya hujan kerana gunung merupakan tulang belakang bagi bumi. Apabila berkumpul kabus pada kawasan bumi yang paling rendah, maka ia akan berkumpul di bawah gunung sehingga menghasilkan awan yang berat. Oleh sebab itu, awan mula mengalirkan air daripada lubang yang terbuka akibat pengumpulan air yang banyak. Bermula daripada itu, air melimpah membasahi bumi. Dalam al-Quran Allah sering menyebut perihal gunung-ganang dan kemudian difirmankan mengenai air yang melimpah ruah seperti surah al-Mursalāt, ayat 27.

وَجَعْنَا فِيهَا رَوَاسِيَ شَامِحَاتٍ وَأَسْقَيْنَاكُمْ مَاءً فُرَاتًا

Surah al-Mursalāt 77:27

Terjemahan: Dan Kami jadikan padanya gunung-gunung yang tinggi dan Kami beri minum kamu dengan air yang tawar.

Contoh kedua ialah pentafsiran ayat 33 surah al-Anbiyā',

وَهُوَ الَّذِي خَلَقَ اللَّيْلَ وَالنَّهَارَ وَالشَّمْسَ وَالْقَمَرَ كُلُّ فِي فَلَكٍ يَسْبَحُونَ

Surah al-Anbiyā' 21:33

Terjemahan: Dan Dialah yang telah menciptakan malam dan siang, matahari dan bulan. Masing-masing beredar pada garis edarnya.

Ayat ini menyebut tentang pergerakan planet yang beredar pada orbit masing-masing. Al-Qāsimī mendatangkan ayat al-Quran daripada surah al-Takwīr, ayat 15 dan 16.

فَلَا أُقْسِمُ بِالْحَسَنِ . الْجَوَارِ الْكُنْسِ

Terjemahan: Aku bersumpah demi bintang-bintang, yang beredar dan terbenam.

Surah al-Takwīr 81:15-16

Al-Qāsimī (1957) menghuraikan bahawa kedua-dua ayat ini menunjukkan bahawa planet-planet di angkasa lepas beredar di atas landasannya yang tersendiri. Planet-planet bukan pusat bagi edaran objek-objek lain di angkasa lepas seperti mana yang didakwa oleh ulama terdahulu yang mengatakan bahawa planet-planet ialah pusat yang tertumpu dan dikelilingi oleh objek-objek lain.

## Kesimpulan

Berdasarkan perbincangan yang dikemukakan di atas, dapatlah dibuat kesimpulan bahawa Jamal al-Din al-Qasimi melalui kitab tafsirnya, *Mahasin al-Ta'wil* dilihat memberi nafas baharu kepada umat Islam bahawa ilmu sains juga perlu dikuasai oleh umat Islam untuk menguasai dunia. Usaha gigih al-Qasimi yang memadukan antara *tafsir bi al-ma'thur* dengan *tafsir bi al-ra'y* memberikan impak positif kepada perkembangan ilmu tafsir khususnya dan juga sebagai jambatan antara al-Quran dengan kajian saintifik semasa.

Berdasarkan analisis yang dilakukan, al-Qasimi mempunyai gaya persembahan yang tersendiri dalam mentafsirkan ayat-ayat al-Quran yang dapat dijelaskan kepada empat gaya iaitu mengemukakan ayat al-Quran lain yang berkaitan ayat yang sedang ditafsirkan, menyebut kata-kata ahli perubatan apabila menyentuh mengenai ayat perubatan, menyebut pendapat ahli falak ketika mentafsirkan ayat berkaitan astronomi, dan mengkhaskan bahagian *tanbihat* selepas menjelaskan secara detail bagi setiap ayat yang ditafsirkan.

## Rujukan

- Āl Ja'far, Muslim. (1980). *Manāhij al-Mufassirīn*. Lubnan: Dār al-Ma'rifah.  
Al-'Ajmi, Muhammad bin Nāṣir al-'Ajmī. (1999). *Āl al-Qāsimī wa Nubūghuhum fi al-Ilmī wa al-Taḥṣīl*. Beirut: Dār al-Bashā'ir al-Islāmiyyah.

- Al-‘Azmi, Khalīl al-‘Azmi. (1988). *Qāmūs al-Šinā’at al-Shāmiyah*. Damsyik: Dār Ṭalās Li al-Dirāsāt wa al-Tarjamah wa al-Nashr.
- Al-Dhababī, Muhammad Husayn. (2005). *Tafsīr Wa al-Mufassirūn*. Kaherah: Dar al-Hadith.
- Al-Kawakibi, ‘Abd al-Rahmān. (2011). *Tabā’i‘ al-‘Istibdād wa Maṣāri‘ al-‘Isti bād*. Kaherah: Kalimāt ‘Arabiyyah Li Tarjamah Wa al-Nashr.
- Al-Qāsimī, Muhammad Jamal al-Din. (1957). *Maḥāsin al-Ta’wīl*. Tahqīq Muḥammad Fu’ād ‘Abd al-Bāqī Kaherah: Dar al-Ihya’ al-Kutub al-‘Arabiyyah.
- Al-Qasimi, Zāfir al-Qāsimī (1965). *Jamāl al-Dīn al-Qāsimī wa Ḥāfiḥ al-Asrīh*. t.tpt.: t.pt.
- Al-Rumi, Fahd ‘Abd al-Rahmān bin Sulaymān al-Rūmī. (1416H). *Buḥūth Fī ‘Uṣūl al-Tafsīr wa Manāhijuh*. Riyād: Maktabah al-Tawbah.
- Alvia Kurniawan et al. (2009). *General Dictionary of Geology*. Yogyakarta: Environmental Geographic Student Association.
- Al-Zirkli, Khayr al-Dīn. (2002). *al-Aḥām Qāmūs Tarājim li Ashhari al-Rijāl wa al-Nisā’ min al-‘Arab Wa al-Musta’ribīn wa al-Mustashriqīn*. Beirut: Dār al-‘Ilmi Li al-Malāyīn.
- Angelo, Joseph A. Angelo, Jr. (2002). *The Facts on File Space and Astronomy Handbook*. New York: Checkmark Books.
- Baharuddin Zainal. (2004). *Ilmu Falak*. Kuala Lumpur: Dewan Bahasa dan Pustaka.
- Barras, C.B. (2004). *Ship Design and Performance for Masters and Mates*. United Kingdom: Elsevier Butterworth-Heinemann.
- Bhattacherjee, Anol. (2012). *Social Science Research: Principles, Methods and Practices*. Florida: University of South Florida Tampa Library Open Access Collections.
- Bradshaw, Michael (2008). *World Regional Geography*. New York: McGraw-Hill Companies Inc.
- Chapman, Richard E. (1995). *Physics for Geologists*. London: University College London (UCL) Press.
- Kamarul Azmi Jasmi dan Noordyana Hassan. (2013). Al-Quran dan Geologi, dlm. *Geologi, Hidrologi, Oceanografi dan Astronomi dari Perspektif al-Quran*. Selangor: Univision Press Sdn. Bhd.
- Laman web al-*Alūkah al-Majlis al-Ilmī*, <http://majles.alukah.net/t30300/>, dikemas kini 1 April 2009, dicapai 29 November 2016.
- Mahmud, ‘Abd al-Ḥalīm. (2000). *Manāhij al-Mufassirūn*. Kaherah: Dar al-Kitab li al-Misr.
- Muttaqui, Iqbal Aziz et al. (2009). *Secondary Biology Class IX-X*. terj. Md. Obaidur Rahman Sikder dan Raihana Begum. Dhaka: National Curriculum and Textbook Board.
- Nuwayhid, ‘Ādil. 1988. *Mu‘jam al-Mufassirūn min Ṣadri al-Islām hatta al-‘Asri al-Ḥādir*. Lubnan: Mu’assasah Nuwaihid al-Thaqāfiyyah.
- Santos, Renato L. et. al. (2001). Animal models of *Salmonella* infections: enteritis versus typhoid fever. *Journal Microbes and Infection*. (3)14-15, 1335.
- Yahaya Jusoh. (2014). *Falsafah Sains dan Teknologi Menurut Al-Quran*. Skudai: Penerbit UTM Press.